

欽定大清會典事例

欽定大清會典事例卷一千一百五十九

步軍統領

職制
緝捕 巡夜

緝捕。○順治初年定。京城盜賊傷人劫財者。該汛直宿步軍校。罰俸六月。步軍副尉。罰俸兩月。步軍總尉。罰俸一月。看街領催兵丁。鞭一百。○又題准。光棍藉端詐人財物。搶奪市肆。如得財私縱者。步軍總尉。步軍副尉。步軍校等革職。領催兵丁。枷號一月。鞭一百。如失於覺察者。步軍校。罰俸六月。步軍副尉。罰俸兩月。步軍總尉。罰

俸一月。領催兵丁鞭一百。○又題准。步軍尉獲強盜審實者。一名賞銀五兩。緝獲光棍審實者。一名賞銀三兩。緝獲竊盜審實者。一名追竊盜銀一兩賞給。○康熙二年題准。凡穿窬竊盜。翦絡割包奪人衣帽刺取銀錢等賊。或經失主暨別管官拏送。與該管汛地拏獲者。一體免議。若被他人拏送者。步軍校罰俸三月。步軍副尉罰俸一月。直日領催兵丁鞭五十。○九年定。京城內有姦細放火。不查拏者。該管步軍校降四級調用。步軍協尉。副尉降二級調用。步軍翼尉降

一級留任。步軍統領罰俸一年。○十一年題准。正陽門崇文門宣武門外關廂被盜者。巡捕營照城內失事例議處。○十二年題准。竊盜被獲。係某柵欄走出者。該管步兵鞭一百。○十六年題准。步軍統領下番役與步軍校等。一年內拏獲強盜或光棍十五名者。強盜每名賞銀五兩。光棍每名賞銀三兩。向戶部取給。不及十五名者。不准給賞。○二十一年題准。前三門關廂內失事馬步兵丁。當時有能擒獲二三名賊盜者。免其責究。如一名不獲。該汛馬步兵丁等。各責

四十板。二十四年議准。步軍所管汛地有犯私鑄私毀及攬和小錢行使。事發該管官知情者。革職照例治罪。失察者。步軍校降一級罰俸一年。步軍協尉副尉降一級留任。步軍翼尉統領各罰俸一年。有能拏獲者。不論年月遠近皆免議。係本衙門官拏獲者。該汛失察官免議。若經別衙門拏獲。失察之該管官仍議處。又定步軍營兵並無私讎別故。因公事教訓。將該管官殺死者。步軍統領翼尉罰俸六月。步軍協尉副尉罰俸一年。步軍校罰俸二年。私讎殺死。或

因公挾讎力傷該管官者。步軍統領翼尉罰俸三月。步軍協尉副尉罰俸六月。步軍校罰俸一年。○又定。城內黏貼匿名揭帖。該步軍校等官不行緝拏。別經發覺者。步軍校罰俸一年。步軍協尉副尉各罰俸六月。步軍翼尉罰俸三月。步軍統領罰俸一月。○又定。番役兵丁私用非刑害人。該管官不約束者。革職。○又定。步軍校汛內有違禁開設店面。容留來路不明之匪類者。將步軍校罰俸一年。步軍協尉副尉各罰俸六月。步軍翼尉罰俸三月。步軍統領罰俸兩月。○

二十五年題准。旗下逃人。若步軍校拏獲至六十名者。加一級。步軍協尉督率步軍校拏獲百二十名者。加一級。步軍翼尉統計所管四旗步軍。督率拏獲至四百八十名者。加一級。步軍統領督率八旗步軍校及番役拏獲至九百六十名者。加一級。數多者。照此遞加議敘。○又議准步軍校等所管汛地內有在路身死者。步軍校不將情由申報刑部。罰俸六月。○又定步軍營兵有犯關毆致死者。步軍統領翼尉罰俸三月。步軍協尉副尉罰俸六月。步軍校罰俸一年。○

又定。旗員將步軍拏至家中禁打者。審實革職。如禁打損傷者。審實革職。交部治罪。若延醫祭祀嫁娶燕會。因而夜行。步軍勒索不肯放行者。步軍鞭五十。因被步軍勒索。即責打有傷者。罰俸六月。○又題准。步軍校於一年內拏獲強盜五名者。紀錄一次。十名紀錄二次。十五名加一級。三十名加二級。步軍協尉。副尉所管步軍校等。一年內拏獲強盜十名者。紀錄一次。二十名紀錄二次。三十名加一級。步軍翼尉所管一翼步軍校等。一年內拏獲強盜二十名者。紀錄一

次四十名紀錄二次六十名加一級步軍統領
所管八旗步軍校番役等。一年內拏獲強盜四
十名者。紀錄一次八十名紀錄二次百二十名
加一級其所獲多者。各照本管應得議敘按數
遞加。步軍校於一年內拏獲竊賊及強惡六十
名以上者。紀錄一次百二十名以上者。加一級
二百四十名以上者。加二級步軍協尉副尉所
管步軍校等。一年內拏獲竊賊及強惡百二十
名以上者。紀錄一次二百四十名以上者。加一
級步軍翼尉所管一翼步軍校等。一年內拏獲

竊賊及強惡。二百四十名以上者。紀錄一次。四百八十名以上者。加一級。步軍統領所管八旗步軍校及番役等。一年內拏獲竊賊及強惡。四百八十名以上者。紀錄一次。九百六十名以上者。加一級。拏獲多者。均照數議敘。如係步軍翼尉。協尉。副尉。親身拏獲者。照步軍校議敘。至步軍校名下所獲之數。雖不及紀錄。其步軍統領翼尉。仍總計議敘。拏獲強盜竊賊惡徒。均由刑部定擬。彙咨兵部議敘。○二十六年覆准。拏獲持刃傷人之賊。首先擒拏之人。賞銀十五兩。第

二人賞銀十兩。第三人賞銀五兩。若所獲係但持刃而未至傷人者。不給賞。○三十三年覆准巡捕三營地方盜賊發覺。千把總免其住俸降調。如城內失事。責三十板停升。限一年緝賊全獲免議。如限內不獲。加責三十板。仍勒令照案緝拏。免其停升。如有拏獲逃人。例應議敘者。照例議敘。若有加級紀錄。准其抵責。○三十七年議准。京城內遇有強盜白晝傷人。搶奪財物。該汛步軍校等將賊犯當場拏獲。及一月之內全獲者。免議。如一月內拏獲一半。步軍校罰俸一

年。步軍協尉副尉。罰俸六月。賊犯照案緝拏。如一月內不嚴緝。致賊遠逸者。步軍校降二級調用。步軍協尉副尉降一級調用。所有加級紀錄。不准抵銷。步軍翼尉。罰俸一年。步軍統領。罰俸六月。汛地步軍等各鞭一百。賊犯交與接管官照案緝拏。其關廂內遇有強盜白晝傷人搶奪財物。該管官員俱照此議處。汛地馬步兵丁各責四十板。○又議准。步軍領催等將拏獲賊犯得財私放。該管步軍校失於覺察。其賊在十兩以下者。罰俸一年。十兩以上者。降一級留任。知

情故縱者革職。○四十一年議准。京城內盜賊傷人。劫去財物。將該汛步軍協尉副尉各罰俸九月。步軍翼尉罰俸六月。步軍統領罰俸三月。

嘉慶四年定
兩翼總兵同

盜案照數緝拏。該汛直宿步軍校

降二級留任。罰俸一年。限一年緝獲。本汛管街領催步軍。及本汛看守柵欄步軍。各鞭一百。如一年內拏賊一半。步軍校准其開復。一年限滿。獲不及半。無別案失事者。步軍校降二級調用。本汛領催步軍。看守柵欄步軍。皆枷號一月。鞭八十。一年不獲。又失事者。步軍校降三級調用。

本汛領催步軍。看守柵欄步軍。枷號四十日。鞭一百。革退。未獲逸犯。交接任官照案緝拏。驍騎堆撥相近處失事。該直班官罰俸一年。驍騎照步軍例治罪。若前三門關廂內失事。將三營專汛守備。降三級留任。乾隆四十六年定。都司同。兼轄參將遊擊。降二級留任。專汛千把總。在兵部各責四十板。該汛馬步兵。俱責四十板。限一年內緝賊全獲者。准其開復。不獲專汛兼轄各官。照原叅所降之級調用。千把總革職。兵丁革退。仍交刑部枷號四十日。責四十板。未獲賊犯。交接管官照

案緝拏。○又議准。惡徒在街肆行無忌。或藉端挾詐。勒騙財物。公然搶奪。攪擾市肆行兇者。責成該汛步軍校。並步軍翼尉。協尉。副尉。不時緝捕。有失察者。步軍校罰俸六月。步軍協尉。副尉。罰俸兩月。步軍翼尉。罰俸一月。領催步軍鞭一百。僕明知惡徒不緝拏者。革職。如得財私縱。誑稱脫逃者。革職。領催步軍皆交刑部治罪。若領催步軍得財私縱。誑稱脫逃。該步軍校並不知情者。照失察步軍犯賊例議處。○五十一年覆准。前三門關廂內失盜。專汛兼轄各營弁。一年

內獲賊一半者。留任效力。如一年無獲。仍照舊例處分。○雍正六年議准。嗣後在京奉

旨捕緝人犯。及毆斃人命。並關係要案人犯脫逃。在城內者。責成該汛步軍校。住俸限一年緝拏。如於一月內拏獲者。免議。一年限滿不獲。降一級調用。人犯令接管官緝拏。若非經管應捕之官。並該上司大員。能於一月以內拏獲一名。紀錄二次。一月以外拏獲一名。紀錄一次。○八年議准。京城內有失竊之案。汛地步軍校等。於事主呈報被竊之日。即報步軍統領衙門。勒限半年

緝賊限內拏獲免議。逾限無獲。該汛步軍校罰俸三月。步軍協尉副尉各罰俸兩月。直日領催步軍各鞭五十。夜間行竊被獲。供由何處柵欄走出者。將該處守柵步軍鞭一百。如別汛步軍校能於限內拏獲賊犯者。紀錄一次。○乾隆四年議准。步軍營各有分管地方。如有賭博賭具等案。失察緝獲。皆照標營武職例。將步軍統領翼尉照提督總兵例定議。步軍協尉副尉照兼轄之副將參將遊擊都司守備例定議。步軍校照專管之都司守備千總把總例定議。○五年

奏准。直月捕盜步軍校遇強盜案。於事主呈報之日起。勒限半年緝賊。限內拏獲免議。逾限不獲者。降一級留任。罰俸六月。仍限一年緝賊。一年內緝獲一半。准其開復。不及一半。將捕盜步軍校照所降之級調用。捕盜步軍鞭八十。如遇竊案。亦於事主報竊日起。勒限半年緝賊。逾限不獲。捕盜步軍校罰俸三月。捕盜步軍鞭三十。限內緝獲者免議。○又覆准。京城內強竊之案。捕盜步軍校於承緝限內。將賊犯拏獲者。專汛步軍校等皆免議。若經別管官緝獲者。捕盜步

軍校免議。其專汛步軍校等仍行處分。○七年議准。京城內盜案。該汛步軍校隱諱不報。或以強為竊。以多為少。或賄囑事主。通同隱匿者。將該汛步軍校革職。步軍協尉。副尉。翼尉。扶同徇隱者。皆降三級調用。失於查報者。降二級調用。步軍統領。知情降一級留任。不知情。罰俸一年。如賊已全獲。皆免議。若事主未報。失事無實據。別經發覺者。仍照承緝例定議。免其諱盜處分。諱竊不報。該汛步軍校降一級留任。限半年緝賊。限內拏獲。准其開復。限滿不獲。降一級調用。

竊犯交接管官照案緝拏。步軍協尉副尉明知被竊扶同隱諱者。照步軍校例議處。失察者罰俸六月。勒限半年緝拏。限滿無獲。罰俸一年。竊犯照案緝拏。有能察出揭報者。仍照承緝例定議。其事主未報。該汛步軍校無從查緝。別經發覺者。免其諱竊處分。仍於發覺之日為始。將未獲賊犯。限半年緝獲。限滿不獲。罰俸三月。竊犯照案緝拏。已拏獲者免議。○八年議准。三營地方竊案。照五城司坊之例。凡遇失竊。巡捕營專汛武職。於失事之日起。勒限四月緝拏。限內全

獲及拏獲得半者。皆免查叅。如四月限滿。賊未全獲。獲不及半。皆由步軍統領衙門叅送兵部。將專汛官住俸。勒限一年緝拏。限內全獲。或緝拏及半。准其開復。逾限不獲。按限劾叅。將專汛官罰俸一年。賊犯照案緝拏。○二十五年議准。嗣後京城內外。如有迷失幼孩之案。內城由該管地方步軍校。即日報明步軍統領。轉行順天府。外城由各該管衙門。報明該城。並一面行知。內外看守城門官兵。層層邏訪。加意盤詰。即飛飭所屬該管員弁。選差躡緝。並通飭內外城附

近地方官弁一體稽查嚴緝。如該管官弁據報不即轉報關緝以致遲誤者。照推諉事件例議處。緝獲之日。審係迷拐。將失察員弁照例分別議處。其鄰境地方員弁有能盤獲迷拐之犯。量予紀錄二次。○二十九年議准。巡捕三營專汛員弁呈報盜賊案件。步軍統領衙門向俱移會都察院嚴飭司坊官一體勒限嚴緝。嗣後遇有失盜事發。一面呈報通緝。一面飛關大興宛平二縣。該縣亦即關會前途州縣一體協緝。○又議准。巡捕三營所管汛地遇有不知姓名人被

傷身死。即呈報步軍統領。報明兵部。勒限嚴緝。正兇。俟審明是盜是讎。照例察議。其捕役勒限嚴緝。如一月不獲者。責比。三月至五月不獲者。責革枷號。如於限內緝獲正兇者。於房租項下。酌量動支給賞。○三十八年奏准。嗣後八旗步軍校等。如果平日勤慎。管理地方亦好。二年之內。並無貽誤。該管地方又無人命竊盜案件。由步軍統領衙門查覈。將該員職名送部議敘。紀錄一次。○五十七年奏准。嗣後京城前三門關廂。被盜疏防。如限內獲盜及半。而盜首未獲者。

初叅專汛官罰俸一年。兼轄官罰俸六月。二叅無獲。專汛官罰俸二年。兼轄官罰俸一年。三叅無獲。專汛官降二級留任。兼轄官降一級留任。未獲盜首。仍入年終彙叅。○嘉慶四年

諭京城前三門外。居民稠密。商賈輻輳。宵小最易藏姦。近因查辦長新店被劫一案。究出盜匪。多有在城外各處潛蹤。及茶坊酒肆會聚者。京師重地。豈容宵小藏姦。貽累地方。因思提督例係駐紮城內。城門上鎖以後。外城巡捕員役。或未能實力巡防。不可無大員彈壓稽查。以專責成。著派左右兩翼總兵二人。每月

輪出一人。在南城外駐紮半月。督率所屬。晝夜認真巡緝。並賞給入官房屋一所。為該總兵住宿辦公之所。該總兵等務須實力稽查督緝。俾盜匪斂迹。居民安堵。以副委任。○六年奉

旨。本年夏間雨水過多。城中軍民居住房間。牆垣多有坍塌。今值秋閒。恐賊盜未免乘機偷竊。城中僅有步軍統領衙門大員一人。夜閒巡查。恐亦不能周密。著將前門外住班之總兵。暫令進城輪流稽查。庶可寧謐。俟明歲春融後。軍民等將牆垣修理整齊。再著左右翼總兵赴前門外輪住。○七年

諭。左右翼總兵向來輪替一人。在南城外住宿彈壓。但城外各營官弁。因有大員在彼。遇事轉存觀望。恐漸啟推諉之習。嗣後該總兵等。不必在城外住宿。仍隨時出城。親行察看。以專責成。○又奉

旨。御史書興奏。請慎重倉糧。專責巡查。一摺。京城內外倉廩。原有額設弁兵。以資巡查。今該御史請添設堆撥。增派兵丁番役。並嚴定處分。其應如何酌定章程之處。著交步軍統領衙門妥議具奏。欽此。遵

旨議定。查內城七倉。俱係甃牆。高一丈有餘。其堆撥相隔。不過五十丈。俱屬嚴密。毋庸添設。惟城外太

平倉。隨倉門之五堆至六堆。相隔一百七十四丈。七堆至八堆。相隔一百十四丈有餘。未免過遠。即於折中添設堆撥二座。照各堆撥兵丁名數。撥派防守。以資嚴密。○又奏定京城關廂五營地方。大盜糾夥。將人殺傷。劫去財物者。專汛都司守備千總把總外委革職留任。兼轄副將參將遊擊俱降二級。統轄提督總兵俱降一級。均戴罪勒限三箇月緝拏。限滿不獲。專汛都司等官革任。兼轄副將等官降二級調用。統轄提督總兵俱降二級留任。所有加級紀錄俱不准。

抵銷。兵丁革退。交刑部治罪。盜犯交接任專汛兼轄各官。勒限緝拏。限滿不獲。專汛官初參降一級留任。兼轄官罰俸一年。限一年緝拏。限滿不獲。專汛官降一級調用。兼轄官降一級留任。賊犯照案緝拏。○九年

諭。嗣後著步軍統領五城御史。嚴飭所屬營汛司坊等官。各將所管地面。晝夜巡查。俾匪類不能潛蹤。如再有強劫之案。一經發覺。必將疏防文武各員。嚴行懲辦。不稍寬貸。○十二年

諭。據給事中周廷森奏。京城各堆柵額設兵丁。令其輪

班晝夜巡守。立法至為嚴密。近年來漸就廢弛。每於定更後。擊柝兩三次。旋各閉門安寢。寂不聞聲。甚或鎧燭不設。內外城一律如是。以致竊案日多。請敕令步軍統領衙門。嚴飭各營員認真稽查等語。京師都會殷繁。五方雜處。外來匪徒。易於潛蹤。向來各街市設立堆撥柵欄。晝夜巡邏。不容偶有疏懈。今據該給事中奏。西城一月中。屢報有翻牆入室之案。著步軍統領衙門。嚴飭弁兵等。嚴密巡防。毋得久而生懈。至該給事中請於冬三月。敕令左右翼總兵分班駐紮外城稽察一節。此可不必。各堆柵巡夜支更。本屬弁

兵專責。該管提督總兵。惟當認真整飭。隨時教誨。自不致日久廢弛。豈必身親駐宿該處。方足以資彈壓。即如現在該提督總兵。皆在內城駐紮。而內城弁兵。亦不免有偷安怠惰者。豈外城一經有總兵駐彼營伍。即頓然改觀乎。嗣後著該提督總兵於所屬各弁兵。實心督察。並日間隨時親赴外城。逐段稽查。以肅營伍而戢姦宄。不必紛更定制也。○十四年

諭。京城為輦轂重地。向例各營汛設立堆卡。以司稽察。各衙門建置柵欄。以謹啟閉。所以晝夜巡防。肅清地面者。至周且備。乃營汛日久玩生。竟不認真巡緝。甚

至官民往來車輛間有被竊衣包等項。向該處汛兵查問。越一二日。僅以失物當票給還。事主取贖。並不根究正賊。嚴行懲辦。其各街柵欄。近有朽腐損折之處。毫無關閉。以致宵小夤夜出入。乘間滋擾。而支更各汛兵。又復相率因循廢弛。外城疏懈。更復視為具文。報竊之案日多。緝獲之賊十無一二。所謂戢盜安良者何在。嗣後各處柵欄。著步軍統領衙門派員詳加察看。其必應整理者。即當量為修葺。以資防禦。仍嚴飭各營汛弁兵。晝夜認真巡緝。加意防守。務使宵小潛蹤。地方寧謐。僅經此次飭諭之後。再有廢弛玩

巡情事。一經發覺。定將專管各員。從重懲治。○十五年

諭刑部奏審擬已革世管佐領善福同伊子五十三逃走。自行投回一案。已依議行矣。此案善福於本年八月初六日。因心慌病發。帶同伊子五十三逃往西山。在彼住歇。直至九月十九日自行投回。前後凡四十餘日之久。當該旗行文知照之初。如果各該衙門認真緝拏。則西山離京不遠。而該革員又係父子二人。患病在彼居住。非隻身潛匿者可比。一經訪察。蹤迹顯然。無難立時就獲。又何至宕延日久。直待其自行

投回。皆由各衙門緝捕廢弛。番役等任情疏懈。凡遇查拏案犯文書。知照到日。官員等先已視為泛常。不過奉行故事。交番役照例緝拏。而番役等怠玩性成。動輒疏縱。甚且有陰為庇護情事。以致易破之案。亦不能破。易獲之犯。亦不就獲。即如廣興案內之楊玉。李十兒案內之劉老兒。此皆有名姓可查之人。迄未拏獲。又何況馬譚氏一案。未查出兇手姓名。經年累月。躡緝無蹤。又安用此等番役為耶。再如太監中亦時有報逃者。其聲音狀貌。尤易識別。捕獲更自不難。而該衙門亦從未有拏獲者。俱不過日久聽其自行。

投回。成何事體。著通諭步軍統領順天府五城及內務府各衙門。嗣後各加意督飭。凡有應緝案犯。俱著嚴立限期。責成番役等上緊捕獲。其限滿不獲者。將該堂司各官分別議處。番役等立予重懲。以儆懈玩。

○十六年奉

旨。京都內城九門城垣。安設堆撥。輪派官兵駐守巡查。本年五月復經新議章程。嚴密稽察。恐該官兵等仍有頂替曠誤等弊。昨派潤祥等八人前往分段查點。茲據各查明覆奏。其該班之章京兵丁等。有全無曠誤者。亦有曠班不到者。人數多寡不齊者。且有包班

頂替應名者。均應分別查辦。著軍機大臣彙覈詳議具奏。領催兵丁著先交刑部審訊。○又奉

旨。京都內九門城垣。分段安設堆撥輪派八旗官兵駐守巡邏。全在統轄大員認真稽察。方不致日久懈弛。嗣後除親王郡王御前大臣軍機大臣領侍衛內大臣兼都統者。或軍機大臣有兼副都統者。均毋庸上城巡查外。所有各旗都統副都統無論內廷行走及兼管事務繁多之員。均著上城巡查。都統每月上城二次。副都統每月上城三次。不必豫定日期。隨時親往密查。並著步軍統領衙門飭知管理馬道官員隨

時具報該衙門。每月彙奏一次。如有曠誤不到者。據實叅奏。其各旗參領。每月上城六次。輪流派查。不必在城住宿。至城垣舊有繩痕。前經飭令工部勘明修整。茲朝陽門迤北附近萬安倉一帶城垛內面修補整齊。外面仍間有繩痕。自係前次派出承修之員。辦理草率。著工部查明此段原派之員。罰令賠修。以示懲儆。○十七年

諭。近日京城內外竊案繁多。甚至皇城內有賊犯拒捕傷人之事。巡緝懈弛。罔知儆畏。並聞緝獲賊匪內多有徒遣釋回之犯。詰訊供詞。則稱外省居民散處。編

設保甲。稽查較嚴。不似京城人居稠密。易於潛藏。京師乃輦轂近地。理宜加倍肅清。定制設立步軍統領衙門五城御史。又有順天府大宛二縣。其所屬營汛司坊兵役牌甲。棋布星羅。百倍於外省。原令其盤詰姦宄。綏靖市廛。乃相率廢弛。致宵小易於潛蹤。轉不若外省之整肅。以首善之鄉。為逋逃之藪。朕實深抱愧。自知用人不當。該管官所司何事。寧不赧顏知愧乎。著通諭步軍統領五城順天府督飭所屬。激發天良。各思禁暴戢姦。為職守所當盡。分率兵役。嚴密巡查。弭盜安良。俾首善之區。俗靖風淳。勉副朕諄諄訓。

戒至意。○道光五年

諭御史隆勛奏請定南營巡察章程一摺。京師係輦轂重地。前三門外。五方聚處。司坊捕役。額設無多。而南營弁兵。星羅棋布。果能實力稽查。何致宵小溷迹。如該御史所奏。近來報竊之案。幾無虛日。移營會緝。視同具文。甚至街巷堆撥。僅存空屋。疲玩已極。著步軍統領衙門。嚴飭該營參將。遊擊等官。督率各汛員弁。無分畛域。嚴密稽查。有犯必懲。緝拏務獲。其各處堆撥。務須晝夜巡邏。毋許曠班貽誤。有名無實。如有仍前玩誤。員弁嚴叅懲處。兵丁重責斥革。並著五城御

史督同司坊官一體嚴緝。以戢姦宄而靖閭閻。○九年

諭嗣後八旗五營報竊之案。責令翼尉副將等官。務各督同所屬。實力緝拏。若一季之內。每翼每營。未獲在十案以上者。即將該翼正副翼尉該營副將參將遊擊等官。交部議處。如一季之內。並無報竊案件。准將該旗營各員等交部議敘。○又

諭京城内外地面。除重大案件。及緝捕廢弛之員。由該步軍統領隨時奏參外。其尋常報竊。承緝官例止罰俸之案。每翼每營於一季內。未獲正賊在十案以上

者。翼正副翼尉副將參將遊擊等官。罰俸六箇月。如一季內並無報竊之案。各給予紀錄一次。○又

諭。耆英等奏請嚴禁軍流徒罪暨遞籍人犯脫逃來京一摺。著通諭順天府暨直省各督撫。嚴飭所屬嗣後每遇軍流徒罪。及遞籍人犯到配。務各遵照定例。於每月朔望。親身按名點驗。如有脫逃。立即申報上司。及原犯事地方查拏。並將疏縱之總甲人役等。照例嚴懲。毋任隱匿。並著步軍統領衙門。逐案稽覈。遇有軍流等犯脫逃來京。搶劫疊竊。獲犯後究出脫逃日期。查明該省有無申報。隨時聲明。其贓數無多。罪名

較輕者。仍咨刑部照例覈辦。○二十八年奏准。副翼尉二員。專管督催更鼓。巡查街道。如協尉以下各官空誤。廳堆更鼓不齊。至三次。及地面報竊至三次者。將該副翼尉罰俸六箇月。不准抵銷。如能認真稽察。地方安靜。半年無竊案。將該副翼尉咨部給予紀錄二次。如地面失事。該旗隱匿不報。照扶同徇隱例。一併附叅。○又奏准。每甲喇遇有承辦步軍校缺出。先由該翼尉擇年富力強。認真辦事之員。秉公保舉。再由步軍統領揀派。責成該員辦理。一甲喇事務。遇有升階。

即在本旗承辦官員內揀選升補。如該管地面報竊案多。事務廢弛。即將該員降革。○又奏准每甲喇設立巡夜兵十名。八旗共八百名。分為兩班。每夜每甲喇輪派步軍校一員管帶。如有竊案。除將該地面官照例叅辦外。仍將本甲喇直班巡夜兵從重責懲。限十日緝拏。限滿無獲。從嚴懲辦。直班管帶官咨部記過。如一季之內記過三次者。折罰俸半年。不准抵銷。如認真稽查。扣足一年並無過失。將管帶官咨部給予紀錄二次。兵丁優加獎賞。○又奏准八旗捕盜兵

四百名。分為四班。每夜以一百名。責令各該旗直班管帶官。督飭巡查。賞罰與巡夜兵一律辦理。○二十九年奏准。凡營城與大宛兩縣。及附京交界處所。互相會哨巡邏。○咸豐元年

諭。步軍統領衙門所屬旗營官員。前擬公事錯誤處分。專條九款。於通行則例。顯有窒礙。又旗營竊案。每年按季奏請議處。議敘章程。賞罰未能平允。均毋庸議。旗營各員。緝捕為要。惟在認真督察。懲勸公明。嗣後著仍遵守舊章。於各員公事勤惰。隨時酌量賞罰。分別辦理。俾疲玩積習。日就漸除。正不在多設科條。轉

滋避就也。○三年奏准。揀派捕盜步軍校四員。各帶
技勇兵丁。作為海捕章京。通查一翼四旗緝捕
事務。如有盜賊。會同該地面極力兜拏。不得互
相推諉。○十一年

諭。現在山東土匪。擾及直隸大名一帶。京師居民稠雜。
恐有姦匪溷迹。窺探虛實。著周祖培等實力辦理團
防。並著步軍統領衙門。順天府。嚴密查拏。形迹可疑
之人。毋得日久生懈。城內每有搶劫盜案。亦應督率
兵役。晝夜巡邏。認真緝捕。以期內患肅清。至城外
地方。前經勝保派兵查拏土匪。漸臻安謐。此時無兵彈

壓恐匪徒復行搶掠。著張祥河董醇嚴飭各屬編查保甲。嚴緝姦宄。不得視為具文。顯預了事。並著瑞常等督飭將弁。於城外地方。隨時稽察。遇有匪徒。即行拏獲。從嚴懲辦。以除姦宄而靖地方。○同治元年奏准。鋪戶鄰佑人等。協同拏獲盜犯。經刑部審結後。步軍統領衙門。於入官房租項下。五城於賞捕生息項下。酌量情形。分別給賞。○三年奏准。八旗五營員弁。拏獲鄰境斬梟斬決盜犯。在四名以上者。並本境結夥搶劫情形較重之兇盜。拏獲過半者。隨時擇尤覈實保奏。如有承緝未

完要案。以所得優獎。照例議抵。

巡夜。○同治元年

諭。京師為輦轂重地。近時搶劫盜案。層見疊出。捕務實屬廢弛。茲據瑞常等酌擬下夜章程。並請嚴定緝捕處分。著即照議辦理。所有該衙門舊有及新挑技勇兵。著准其暫停派往堆撥。責令管理四場章京等管帶。於皇城內外八旗地面。輪班下夜。認真巡緝。遇有明火聚眾搶劫盜匪。務即拏獲。不准疏脫。儻敢拒捕。准其格殺勿論。如查有居民鋪戶。聚集多人。吸煙聚賭。及三五成羣。夜游街巷者。立即拏獲究辦。並責成

兩翼翼尉督飭與各旗固山達步軍校所帶下夜步
甲一體巡邏。仍查照向章。申明夜禁。凡兵民人等。不
得於深夜無事閒游。以符定制。該兵丁等。果能實心
巡查。捕獲盜犯。除官給重賞外。准其將尤為出力者。
格外超拔。該管帶章京等。准其於定案時。立即酌量
保奏。儻有怠惰疏防等弊。即著將下夜巡緝之章京。
及該地面官等。從嚴叅辦。其外城以及各城門外關
廂集鎮。並責成巡捕五營將弁。督率兵丁。按照現擬
章程。酌量分起。各按所管地面。會同本汛團防。訪查
巡捕。不准疏懈。其一切賞罰。均照皇城內外八旗地

面一律辦理。至兩翼翼尉及巡捕營將弁等。儻敢狃於積習。不知振作。於現擬章程。陽奉陰違。意存掣肘。一經查出。即著步軍統領等從嚴叅革。其各官廳辦事人等。如查有把持地面。徇情受賄。容留盜匪。暗通信息。藉端訛詐等弊。刻即解交刑部治罪。若係該翼翼等自行查出者。免其叅處。別經發覺者。即將該翼翼等隨案解任。一併交刑部嚴行究辦。

[illegible]

欽定大清會典事例卷一千一百六十

步軍統領

職制 禁令一

禁令○順治初年定。

御道上不許閒人坐立。親王以下出入。不許由

御道上行。○又定。看守城門官弁。縱令奴僕依城

搭蓋席棚。賃人取租者。罰俸六月。奴僕鞭八十。

如容閒雜人等近門歇宿。將直班城門領城門

吏。門千總。罰俸六月。若縱容閒雜人近門嚮火。

致延燒城門者。直班城門領城門吏。門千總。革

職。領催步軍交刑部治罪。若將蓄髮僧人。不行查拏。致入城門者。將直班城門領城門吏。門千總各罰俸一月。領催步軍鞭四十。若蓄髮僧人入城棲止。該汛步軍校拏獲者免議。如被旁人拏獲者。將該汛步軍校罰俸一月。○又定京城內起更後閉柵欄。自王以下官民人等。概禁行走。步軍校等分定街道。輪班直宿。步軍協尉。仍行巡邏。兵部不時委官查驗。若柵欄不閉。及不直更者。領催鞭三十。步軍鞭二十七。直宿步軍校。罰俸兩月。直宿協尉。罰俸一月。除奉

旨特差各部院衙門差遣外。其因喪事。生摩及問病。延醫祭祀。嫁娶行走者。直宿步軍校領催步軍等。詳問事故。記其旗分佐領姓名。開柵欄聽出。仍跟隨遞送。交與附近該直步軍放行。其無事故夜行者。如王公等登記姓名。係官或婦女。即送至其家。向鄰佑說明被獲時辰。係民人。即於拏獲處所羈留。均於次日呈報協尉。轉報步軍統領翼尉。將無事故夜行之王公等請

旨交宗人府察議。官員請

旨交部罰俸一月。平人鞭五十。若拏獲之人脫逃者。

直宿步軍校。罰俸三月。直宿協尉。罰俸兩月。如
得財及徇情縱放者。直宿步軍校革職。直宿協
尉降三級調用。若未經起更之先妄拏。俟起更
以後。向鄰佑說明。或不向鄰佑說明。即行送部
者。將直宿步軍校。罰俸三月。直宿協尉。罰俸兩
月。領催步軍各鞭一百。○又定。步軍校看守街
道。曠班不直宿者。罰俸兩月。不俟天明。擅離汎
地者。罰俸一月。領催有曠班不直宿者。鞭五十。
擅離汎地者。鞭三十。步軍曠班不直宿者。鞭四
十。擅離汎地者。鞭二十。其失察領催步軍之步

軍校罰俸一月。○又定看守倉庫官物等處曠班者。係官降一級罰俸一年。兵丁鞭六十。○又定。

皇城内住居人家。遇有喪事。但令僧道誦經禮懺外。不許大作鼓吹送喪日。

皇城内不得撒颺紙錢。○康熙十三年定。每歲小暑起至立秋止。由禮部移知傳行三營。禁止砍伐樹木。焚化紙錢。清明節由禮部知會行內九門。禁止挂紙錢佛朵出城。○二十九年

諭。起火原係禁止之物。城外空地無人之所。尚無妨礙。

今街道間即混行點放。房屋稠密。草廬衆多。甚屬可虞。應嚴禁查拏。其大臣院內點放者。亦著一併嚴禁。再花爆每於年節點放。由來已久。仍聽其便。至唱秧歌。不論忌辰素服日期。皆於通衢肆行唱演。且成羣女裝。穿甲執棍。互演跳舞。甚屬非理。著步軍統領嚴加巡察緝捕。餘仍聽其戲演。○三十四年奉

旨。風箏從前亦係禁止者。今著准撒放。其繫鈴鴿尾者。嚴行拏禁。○四十三年奉

旨。街道鋪戶人等。從前設立木牌。續於木牌地方。改立捲蓬。後又於捲蓬之前。設立木牌。多方占據街途。嗣

後著該衙門查勘。如有似此者。斷不可准其修造。

五十九年奉

旨。大城根下。立有糞場。致有穢惡之氣。再

天壇

地壇。乃至潔之處。而附近地方。亦有似此者。悉令遷移。於大道空遠處。○雍正二年定。城內步軍人等。遇有失火之處。即報知相近該旗。如係東南。令正藍鑲白。西南。令鑲藍鑲紅。東北。令鑲黃正白。西北。令正黃正紅。各二旗往救。如

皇城之內。每翼兩旗往救。僮報火之步軍有誤。照

曠誤火班例。官員罰俸一年。兵丁鞭五十。失察之該管官。罰俸兩月。○四年

諭。婦女入廟燒香。早行禁止。今仍有拴繫駕馬。前赴燒香者。此習甚陋。著嚴行禁止。○七年奉

旨。提督衙門及內務府番役。凡係奉公守法實心效力者。朕已加優賞。以示鼓勵。乃伊等小人。竟有乘該管大臣耳目之不及。生事訛詐。至被騙害之人。因番役皆係爾等所屬。惟恐瞻徇庇護。不敢控訴。隱忍含冤。以致不法番役。毫無忌憚。不可不立專司稽察者。今特簡王大臣等。不時嚴察。並出示曉諭。如有番役仍

前生事。妄行訛詐等情。許於稽察王大臣處具呈首告。王大臣等量其情罪輕重。或即奏聞治罪。或知會該管衙門懲治。俾番役咸知畏懼。而無辜之人不致負屈。於以輯暴安良大有裨益。○十年奉

旨。京城舊例。每值三伏。居民人等。晚間聽其露處乘涼。現今天氣炎熱。傳諭步軍統領。著仍照例行。○十二年議准。凡開鵪鶉園。鬪雞坑。蟋蟀盆。互相賭鬪者。照開局賭博例治罪。其該管官亦照失察賭博例議處。○十三年奉

旨。目今天氣漸寒。京城內外居民稠密。火燭尤宜謹慎。

著步軍統領。飭所屬弁兵小心防範。毋得稍有疏懈。再嗣後儻遇有失火處。如延燒房屋至三四十間以上。即行奏聞。○又

諭。古之葬者。厚衣之以薪。葬於中野。後世聖人易之以棺槨。所以變通宜民。而達其仁孝之心也。本朝肇迹關東。以帥兵為營衛。遷徙靡常。遇父母之喪。棄之不忍。接之不能。故用火化以便隨身奉持。聊以遂其不忍相離之願。非得已也。自定鼎以來。八旗蒙古各有寧居。祖宗墟墓。悉隸鄉土。喪葬可依古以盡禮。而流俗不察。或仍用火化者。徂於沿習之舊。不思當年所

以不得已之故也。朕思人子事親。送死最為大事。豈可不因時定制。痛自猛省乎。嗣後如遠鄉貧人。不能扶柩回里。不得已攜骨歸葬者。姑聽不禁外。其餘一概不許火化。儻有犯者。按律治罪。族長及佐領等隱匿不報。一併處分。朕又聞漢人多惑於堪輿之說。購求風水。以致累年停柩。漸至子孫貧乏。數世不得舉葬。愚悖之風。至此為極。嗣後守土之官。必多方勸導。俾得按期葬埋。以妥幽靈。以盡子職。此厚人倫美風俗之要務也。欽此。遵

旨議定。京城旗民。飭令步軍及巡捕三營。每歲春秋嚴

禁火化。犯者重懲。並出示勸令及時安葬。以厚風俗。○乾隆元年

諭。據都察院審訊。首告因事行賄。刑部司官得銀五百兩一案。全係步軍統領衙門番役等。夥同匪類。捏辭誣陷。供證確鑿。都察院又稱番役私用之白役人等。俗名圓扁子。並非額設衙役。亦無定數。每藉番役名色。嚇詐生事。若遂其所欲。則將事件消弭。否則告知番役捕治。得受賞銀。飽其賂壑。且往往出銀設計誘人犯法。民間甚為擾累。向來步軍統領衙門番役及內務府番役。恣行不法。往往遇事生風。戕敗良善。其

索詐騙害之惡。不可枚舉。是以我

皇考特命王大臣。不時約束稽察。比時稍知畏法斂迹。今則日久廢弛。復逞故智。即如此案。乃目前之顯然敗露者。其他更不知凡幾。朕又聞番役等竟將京城內外地方。各人私自分管。且將六部等衙門事件。各令一人訪察。此則可惡之尤甚者。從來番役之設。不過緝捕潛藏之盜賊。逃竄之罪人。與賭博宰牛等類。至於部院之事。自有該管大員職司稽察。番役何人而敢於私自窺伺。以持其短長乎。著步軍統領嚴行禁止。並將白役圖扁子之類。盡行革退。不許私留一

人致滋閭閻之擾。嗣後儻有被番役等騙害者。准本人赴刑部都察院控告。該部院即據實奏聞。朕必將番役等嚴審治罪。不稍寬貸。○又議准。操演射鵠者。准其演射外。儻有特開賭場抽頭。及容留不射箭買局賣局之人。並大賭銀錢者。即行拏送刑部。照開場賭錢律治罪。○二年議准。五城關廂設立米廠平糶。原以接濟貧民。自應嚴禁囤販。但民間買米之人。有離廠遙遠。老弱婦女。每藉小販到門。就便買食。此等小鋪。有米舂碓。然後米可流通。價不昂貴。嗣後除不許姦民串買囤

積至四五十石。及買作燒鍋之用。其餘肩挑背負。不過數石者。概免查究。○三年議准。禁止米鋪。不許堆積米過五十石。原為使市米流通。若有姦商多賃房屋。一鋪散作數家。或數十家等。巧為囤積者。即由步軍統領。五城御史。順天府君。不時稽察。嚴拏懲治。其肩挑背負。不過數石者。仍准其雜買。○五年奏准。

盛京等處旗人身故。祖塋遙遠。不能送回。呈請火化歸葬者。由該佐領申報都統。移咨步軍統領衙門。委官往驗火化。再京外旗人。奉差告假。出

外身故。無力扶柩回京者。呈報該處官員火化。攜回。其餘概不准火化。違者治罪。佐領族長隱匿不報者。交部議處。○二十五年

諭。前經降旨。將官員俸祿先行借放。米石倍為充裕。而商販來時落價。收買存積。及至支放已停。則乘機昂價獲利。在在有之。京城重地。設官糾查彈壓。至為詳備。顧任一二刁民。乘間居奇。甚至齊行把持。累及閭閻口食。而莫之懲儆可乎。著步軍統領衙門。會同五城御史順天府。嚴行飭禁。如有藉此多收囤積。高擡市值者。即行查拏究處。以為逐利病民者戒。○三十

年

諭王大臣等。擡轎人夫。聚衆賭博。其風甚陋。王等擡轎之人。與大臣等擡轎之人。必須雇覓者不同。王等俱有包衣名色官屬人等。擡轎用人無幾。儘可於此內選用。況王等分例所得藍甲甚多。即分藍甲之錢糧。作伊等擡轎食用。或用包衣人等。毋庸另覓人夫。二者皆為有益。今王等惟計省儉藍甲錢糧。所雇人夫。又不多給工價。再王府甚深。如有此等賭博之事。誰能進其角門拏緝耶。嗣後若欲坐轎。俱用伊等包衣之人。毋庸雇夫。若欲省儉。即應騎馬。又可學習武藝。

至坐轎之大臣。亦當嚴飭所雇人夫。禁止賭博。若仍有此事。朕必重治其罪。著交步軍統領衙門嚴查奏。○三十九年議准。內城統計舊存戲園。共有九座。不准再行加增。嗣後無論城內城外戲園。概不許旗人潛往遊戲。即交各旗該管大臣。嚴加誡諭。隨時查察。步軍統領衙門巡緝訪查。如有旗人擅入戲園。一經拏獲。除將本人照律懲治外。並將管束不嚴之該都統等。交部議處。○四十一年奉

旨。火禁已屬無益。因相沿日久。未便飭禁。今更流為水

菸尤非所宜。著交步軍統領衙門暨五城御史概行禁止。○五十一年

諭。前經降旨。凡在京文武官員。有降級革職留任者。其應得俸米。俱准照原品支領。原所以體恤臣工。且令京師米石流通。俾民食充裕。糧價亦得平減。實為兩有裨益。第恐市僧逐利之徒。一聞此信。即暫將米價減落。以遂其賤買壟斷之私。迨販糴入手。又復囤積居奇。米價仍恐不能平減。是朕加惠臣工之舉。轉為姦商牟利之資。其流弊不可不嚴行禁絕。朕因米糧價值。民食攸關。凡可以設法調劑者。無不豫為籌畫。

且商人亦係四民之一。皆當激發天良。改其壟斷惡習。今流風日下。但知為利。無怪天時之不和。朕亦愧誠感之不至。道德之未洽。天下之商人。皆當各發其天良。而尤臨民之官。所當加之意者也。此次曉諭之後。若仍有姦販賤糶貴糶。其情甚屬可惡。著交步軍統領順天府都察院衙門。嚴密訪拏處治。以示懲儆。其通州近倉處所。商販尤易居積。並著一併嚴查飭禁。○五十一年奏。外城大街。有東曉市。西曉市等處。每乘天未明時。即擺攤各貨。匪竊乘機出售。姦徒利其便宜。私相收買。如本城所竊之物。即於

黑夜趕赴別城所屬之曉市變賣。稽查匪易。嗣後各處曉市。嚴申禁令。仍俟天大亮後。方許擺貨交易。不准於未明時開市。奉

旨。著步軍統領衙門。五城御史。一體飭禁。○五十七年

議准。親王固倫公主。郡王和碩公主。及貝勒門首。俱應設立行馬下馬椿。親王固倫公主之下馬椿。高一丈。郡王和碩公主之下馬椿。高九尺。貝勒之下馬椿。高八尺。其行馬。親王固倫公主。安設八塊。郡王和碩公主。安設六塊。貝勒。安設四塊。每塊以五尺為率。自親王至貝勒之圍居。

除遵

旨不准建蓋朝房外。其門首應設行馬。城內府第應設下馬椿之遠近。惟視其地勢之寬窄。酌量安設。總期於街衢無礙。其安設與否。聽其自便。若安設者不得過此制。貝子以下不得濫行僭用。○

五十七年奉

旨。鋪戶包攬旗員俸米。兵丁甲米。與倉書斗級。私自交結。赴倉支領。希圖從中取利。其弊由來已久。著步軍統領衙門順天府。密訪嚴拏。如有此等包攬領米鋪戶。即行拏獲。人犯枷號。米石入官示懲。以儆其餘。○

嘉慶四年

諭。向來京城九門以內。從無開設戲園之事。嗣因查禁不力。黃緣開設。以致城內戲館。日漸增多。八旗子弟徵逐歌場。消耗囊橐。習俗日流於浮蕩。生計日見其拮据。況城內一經開設戲園。則各地段該管員役。即可藉端訛索。為舞弊肥囊之計。朕亦有所聞知。現當遇密之時。除城外戲園。將來仍照舊開設外。其城內戲園。著一概永遠禁止。不准復行開設。並令步軍統領。先行示諭。俾開館人等。趁時各營生業。聽其自便。亦不必官為抑勒。自禁止之後。並著步軍統領。八旗

滿洲都統一體查察。如該旗地段有違禁開設。經該都統查奏。即免置議。儻並不奏聞。別經發覺者。除將步軍統領及司員等嚴加議罪外。並將該旗都統一併嚴加議處。○又

諭。向來放債人等。私用短票扣折。重利盤剝。例禁甚嚴。乃日久廢弛。仍行違例巧取。候選官員等。既不知自愛。墮其術中。又復自顧考成。隱忍甘受。遂使謀利之徒。罔知顧忌。而所借債帳。日久累重。無以清償。因而挪移官項。朘削小民。此等弊端。實所不免。不可不申嚴例禁。著步軍統領順天府五城各衙門。嚴行禁止。

密行查拏。僅有前項情事。即隨時懲辦。毋得陽奉陰違。致干咎戾。○又

諭。西山煤窯。最易藏姦。聞該處竟有匪徒。名為水工頭者。往往哄誘良人入窯。驅使操作。致斃。殊有關係。著順天府會同步軍統領衙門。派委妥員。密為查訪。如有此等棍徒。即行查拏具奏。按律治罪。○五年

諭。京師米糧。無論官民鋪戶。一概不准出城鬻賣。久經嚴行飭禁。但恐各衙門奉行日久。稍有廢弛。現在漕米將次抵通。兌交。若京城米糧。任聽門軍車戶米鋪人等。私販出城。難保無勾串挪移之弊。並恐市僧之

徒居奇囤積。以致米價漸昂。實於民食有關。自應重
申禁諭。著步軍統領並順天府五城各衙門。酌派番
役人等。輪流查察。如有私販出城及囤積各弊。俱當
嚴行禁止。該衙門等。經此番嚴禁之後。務須實力奉
行。久而無懈。儻番役人等。藉稽查之名。任情訛索。滋
生事端。一經訪聞。必將該管各員及番役人等。分別
嚴辦示懲。不稍寬貸。○又奏准。五城鋪戶所存米麥
雜糧等項。每種不得過八十石。逾數囤積居奇
者。照違

制律治罪。○又

諭。朕恭閱

皇考高宗純皇帝實錄內載。小民知識短淺。種種惑於鬼神。祈求禱祀。為費不貲。如越省進香一事。程途則有千餘里。及二三千之遙。時日則有一月及二三月之久。以有限之蓋藏。坐耗於酬神結會之舉。直隸山東山西陝西等處。風俗大率如此。而河南為尤甚。著各省督撫訪察所屬。有越省進香者。善為化導。徐徐轉移。毋得呼朋聚眾。跋涉山川。以致誤農耗財。漸成人心風俗之害。仰見

皇考。燮民善俗。諄諄教誡至意。朕在藩邸時。即素知民

間有赴髻髻山天台山等處進香之事。而近京各省。相習成風。亦所不免。往往千百為羣。填塞街道。其間男女雜遝。姦良莫辨。不獨耗費錢財。且恐別滋事端。風俗人心。殊有關係。在蚩蚩者。祇於福善禍淫之理。不能深曉。每以進香虔禮。即可仰邀福祐。又或遇父母疾病。許願酬神。以冀速痊。殊不知父母有疾。正當親身侍奉湯藥。焉可越境遠離。而神靈隨處降格。即於本境祠廟。虔誠祝告。亦無不可。况小民果能竭誠事親。諸惡莫作。衆善奉行。自蒙神祇默祐。又何必遠勞跋涉。為此無益之祈禱乎。是此等酬神之事。其始

原為求福免禍起見。但分途四出。結隊成行。其為會首者。藉此斂錢滋事。日久相沿。人數衆多。漸至流為邪教。此而不嚴行禁止。何以正人心而厚風俗。嗣後京城內外及各直省。所有民間一切越境酬神聯羣結會等事。俱著該管衙門及各督撫等。出示曉諭。嚴行禁止。違者按例懲治。○又

諭。向來市曹處決朝審重囚。刑部侍郎會同刑科給事中等。前赴法場監視行刑。先期派委營城文武地方官。清理街道。嚴閉柵欄。不許閒人往來。立法本為嚴密。但恐日久玩生。各員弁等視為具文。不能認真彈

壓。雖現在綱紀肅清。斷無他慮。然獄大典。行刑之地。自應慎重嚴肅。著於每年朝審決囚時。都察院及步軍統領衙門。一體嚴禁巡察。毋許街市閒人擁擠。並著派是日輪住城外之京營總兵。親往巡查彈壓。儻派出城營各員。弁及兵役等。不能實力奉行。街市閒人。仍前擁擠。著監視行刑之侍郎給事中。據實指名參奏。

欽定大清會典事例卷一千一百六十一

步軍統領

職制 禁令二

嘉慶六年奉

旨。步軍統領衙門私用步甲一事。前年正月內早經降旨飭禁。今仍復私行擅用。將來日漸加增。於營務大有關繫。嗣後步軍統領左右翼總兵翼尉等。毋許私用步甲一名。儻經此次飭禁之後。尚有陽奉陰違者。經朕訪聞。或被入叅劾。必當從重治罪。○又奉

旨。京師五城各鋪戶。所存米麥雜糧等項。定例每種不

得過八十石。儻逾數囤積居奇。即照違制例治罪。但念小民無知趨利。若照定數止准存貯八十石。違制罹法者必多。嗣後各米鋪存貯各種米麥雜糧俱准存貯一百六十石。以便流通糶賣。其現在所餘糧石。若按全數入官。該鋪等必致虧折資本。著五城御史查明各鋪戶存貯糧石。除現定額數。每種准積至一百六十石外。餘俱著加恩准其平價糶賣。不許稍有囤積。該吏役等亦不得藉端滋擾。致干咎戾。○又奉旨。嗣後除京城各官廟照例不准招租外。所有私廟房間。仍准照舊出租。惟當飭令僧道等。將租住廟宇之

人查照來歷清楚者。方許容留。仍出具切實甘結。呈報地方官存案。儻該僧道將來歷不明之人。私自存留。一經犯案。必當按例懲辦。○七年奉

旨。番役一項。專司緝捕盜犯。原與隸卒無異。凡各衙門。皂役人等。例不准其為官。其子孫亦不准應試。則番役自應比照此例。以昭畫一。乃從前步軍統領衙門。往往因番役拏獲要犯。輒奏請賞給頂戴。且番役子孫。並有應試出仕者。殊不足以別流品而重名器。著步軍統領衙門。查明番役中。從前得過頂戴者。止准暫留頂戴。不准以實缺補用。其子孫曾經進學及中

式者。留其舉貢生員。不准選用官職。此後亦不准再行考試。如現有出仕者。概令撤回。嗣後步軍統領衙門。遇有番役緝捕勤奮。止准量加獎賞。即實有拏獲要犯者。亦止可從優加賞。毋許給予頂戴。儻再行濫請。即以違制論。○又

諭朕恭閱

皇考高宗純皇帝實錄內載乾隆十八年七月欽奉諭旨。滿洲習俗瀟樸。自我朝一統以來。始學漢文。曾將五經及四子通鑑等書。繙譯刊行。近有不肖之徒。不繙譯正傳。反將水滸西廂記等小說繙譯。使人間看。

誘以為惡。甚至以滿洲單字還音鈔寫贅詞者俱有。滿洲習俗之偷皆由於此。不可不嚴行禁止等因。仰見我

皇考宗正黜邪為風俗人心計者。至深且遠。從前滿洲盡皆通曉清文。是以尚能將小說贅詞繙譯成編。皇考深恐為習俗之害。嚴飭禁止。今滿洲非惟不能繙譯。甚至清話生疏。不識清字。其粗曉漢文者。又以經史正文詞義深奧。難於誦習。專取各種無稽小說。日事披覽。而人心漸即於偷。此不獨滿洲為然。漢人亦更多蹈此陋習。如經史為學問根柢。自應悉心研討。

至諸子百家。不過供文人涉獵。已屬藝餘。乃鄉曲小民。不但經史不能領悟。即子集亦束置不觀。惟喜瞽詞俗劇。及一切鄙俚之詞。更有編造新文。廣為傳播。大率不外乎草竊姦宄之事。而愚民之好勇鬪狠者。溺於邪惡。轉相慕效。糾夥結盟。肆行淫暴。概由看此等書詞所致。於世道人心。大有關繫。不可不重申嚴禁。但此時若紛紛查辦。未免假手吏胥。轉滋擾累。著在京之步軍統領。順天府五城各衙門。及外省之各督撫。通飭地方官。出示勸諭。將各坊肆及家藏不經小說。現已刊播者。令其自行燒毀。不得仍留原板。此

後並不准再行編造刊刻以端風化而息諛詞○又

奉

旨○近來宗室覺羅人員多有不繫紅黃帶侍衛職官不戴翎頂在街市閒游者其意自以穿用常人服色可往來自便必非學習正務有志嚮上之人此風不可不亟行飭禁嗣後著步軍統領衙門留心稽查如有仍前違制者即行叅處○又奉

旨○候補巡捕營都司郭起麟亦係番役之子若照新例止應准其頂戴榮身不准選用官職但該員從前帶兵赴湖北等處勦賊打仗一百餘次曾經賞戴花翎

是以該員於休致後帶領引見特降旨以都司補用。如此時遽行撤回是著有勞績之員轉不能仰邀祿。藉郭起麟著加恩仍以巡捕營都司補用不准再行升擢。此係朕俯念勞勩格外施恩其餘番役子孫不得援以為例。○八年奉

旨。向來

天壇神樂署兩廊以外空地有太常寺官員建屋居住。並租與鋪戶收息以為貼補當差修理之用。但

郊壇重地理宜內外肅清。自不便任聽該官生率行租給平民。在彼存留貿易。惟相沿已久。若驟令搬移則

現在開設店鋪之人資本貨物恐多拋棄著步軍統領衙門在

壇外圍牆之外指定隙地一處准令各官生等將自建房間移於牆外仍准其收租貼補該鋪房民人亦可不致失業其該衙門未經指定飭令搬移以前不必遽行驅逐○又

諭嗣後著步軍統領衙門五城巡城御史於外城開設酒館戲園處所隨時查察如有官員等改裝潛往及無故於某堂某莊游宴者據實查叅即王公大臣亦不得意存徇隱○又

諭巡城御史和靜等奏現在街市有買賣零星之小押

鋪牟取重利。凡偷竊物件俱赴典質。請旨飭禁等語。所奏尚是。此等小押鋪不過希圖謀利而鼠竊匪徒往往藉以銷贓。並聞各街市於天尚未明即擺攤售賣。最易藏姦。而售主亦貪圖便宜。即明知實是賊贓亦不查詢來歷。殊非日中為市之義。此時若將小鋪概行查禁。在生理微薄者或不免生業無依。然不示以例禁。則姦宄公然售賣贓物。尚復何所顧忌。嗣後著步軍統領衙門及五城出示曉諭。不得仍前開設小押。其在街市擺攤者。總於日出後方准售賣。儻其

中有來歷不明之物。於犯案後查出。即將知情買賣之人。按律治罪。以清市肆。而靖閭閻。○又

諭

御史王麟書奏。步軍統領衙門。請將番役一項。仍准子弟居官。實屬率意妄奏。番役人等。專司緝捕。與各衙門隸卒無異。其子孫亦不准入仕應試。上年特降諭旨。著之令典。如有再行濫請。以違制論。原所以別品流而重名器。今祿康等。輒以召募無人。仍請准其子弟居官。妄行籲懇。初奏上時。朕即以為事不可行。勅交該部詳議具奏。諒部議自必駁飭。即或經部議准。朕亦斷不允行。王麟書據實劾奏。實屬持正可嘉。

隸卒人等。所以不准入仕考試者。賤其役。非賤其人。尋常氓庶。原係良民。一經充當差捕。則執役微賤。自不得濫邀登進。若謂係由良民而來。則各衙門卑役。獨不自良民來乎。况上年甫經降旨。定例遵行。番役等從前得過頂戴。不准其實缺補用。其子孫應試中式者。止准留其貢舉生員。不准選用官職。其現在出仕者。概令撤回。今未及一年。復請准令入仕。予奪靡常。成何政體。且據祿康面奏。此項番役。即不便令具濫廁文員。或請加恩。准令備官武職。俾知鼓勵。更屬非是。國家文武分途。名器則一。有何高下。若准令補

授武職。日後必致漸廁文階。又將何以限制。如謂良民咸知賤役不肯踴躍充當。則各衙門卑役設亦挾制官長。以此為詞。豈將隸卒子孫亦概准其居官考試。有是理乎。看來祿康等未免為番役所挾制。或竟受其慫恿。意存市恩。故為此奏。殊屬冒昧。祿康范建豐。早保著交部議處。所有祿康等原奏之摺。該部毋庸議奏。仍著照舊例行。○十年

諭京師設立西洋堂。原因推算天文。參用西法。凡西洋人等情願來京學藝者。均得在堂棲止。乃各堂西洋人每與內地民人往來講習。並有刊刻書籍。私自流

傳之事。在該國習俗相沿。信奉天主教。伊等自行講論。立說成書。原所不禁。至在內地刊刻書籍。私與民人傳習。向來本定有例禁。今奉行日久。未免懈弛。其中一二好事之徒。創其異說。妄思傳播。而愚民無知。往往易為所惑。不可不申明舊例。以杜歧趨。嗣後著管理西洋堂務大臣。留心稽察。如有西洋人私刊書籍。即行查出銷毀。並隨時諭知在京之西洋人等。務當安分學藝。不得與內地民人往來交結。仍著提督衙門。五城順天府。將坊肆私刊書籍一體查銷。但不得任聽書役藉端滋擾。致干咎戾。○十一年

諭。御史楊昭奏請嚴堆卡之守。以重巡防。據稱近來京師南城七門以內。惟初更傳梆。更盡收梆。其一更以至五更。堆卡間既不巡更。敲梆。柵門不掩。夜行不禁。城外亦復如是等語。京城內外。設有堆卡。專司巡防。該兵丁等自應各就地面。徹夜往來。按更擊柝。互相聯絡。柵門必扃。夜行必禁。稽查方能得力。從前左右翼總兵。輪流在南城外駐紮。尚可就近督察。近年來自因總兵移駐城內。該處營汛將弁。未免漸形怠弛。兵丁等巡邏亦相率疏懈。是以竊盜頻聞。該御史所奏。不為無因。祿康文甯福會均著傳旨申飭。嗣後京

城內外著步軍統領等申飭各營汛隨時嚴督堆卡實力巡防。如有情誤偷安者立予懲治。庶官兵共知懲儆而警備亦昭嚴肅。○又

諭祿康等奏番子頭目杜成德所遺七品頂戴虛銜之缺應否選役充補。番役一項原與隸卒無異。前曾明降諭旨不准請給頂戴。即杜成德等亦因所得頂戴在前。姑准暫留。豈有沿為額缺之理。本無所謂缺。何得另選一人充補。祿康等所奏著不准行。嗣後番役或果有能事出力之人擒獲緊要案犯者朕酌量加賞頂戴。不得作為定例。亦不准該衙門奏請賞給。○

十三年奉

旨。朝陽門外太平等倉。既係附近東便廣渠等汛營弁看守。其豐益倉亦係巡捕營汛地面。自應仿照派管。以歸畫一。著照連慶所請。准其改歸中北二營。選派官兵。在該倉門及原設堆撥處所。分段住守。即責成該管官實力稽察。毋任稍有疏懈。其住宿房間。應行修補之處。著交倉場總督。查明照例咨部覈辦。以資棲止。○十四年奉

旨。據祿康等奏。內城向有茶館十餘座。演唱十錦雜耍。並無戲班登臺演劇之事。嗣因禁止內城演戲。所有

十錦雜耍茶館亦全行關閉。伊等空無手藝。懇仍前在茶館演唱等語。此項雜耍。不過無業貧民藉資口食。著准其仍舊在茶館營生。但不許各館影射唱戲。如違例不遵。即將開館之人嚴拏治罪。各該衙門仍隨時查察。毋令滋生事端。○十五年奉

旨。此案書吏錢秉初。輒敢將兵部遠年稿案私賣錢文。鋪戶劉姓收買衙門稿案。作為廢紙。均屬藐法。著交刑部審擬具奏。其起出兵部稿案。並交兵部查明。一併歸案辦理。兵部堂司各官。自請處分。著照所請。交部分別察議。至各衙門稿案。均關緊要。該書吏等敢

於偷竊售賣。或另有作弊營私。意圖銷毀情事。亦未可知。著通飭各衙門一體留心檢查。妥為防範。並著步軍統領衙門出示曉諭各鋪戶等。如遇有售賣稿案者。立即呈首到官。必當官給賞錢。以示獎勵。但等知售賣廢紙所獲有限。而一經首繳之後。獲利轉多。自不肯私自收買。以致獲罪。而書吏等亦必知畏懼。斂迹矣。○又

諭慶桂等奏據廣甯門巡役人等盤獲楊姓身藏鴉片煙六盒。請交刑部審辦。鴉片煙性最酷烈。食此者能驟長精神。恣其所欲。久之遂致戕賊軀命。大為風俗

人心之害。本干例禁。該犯楊姓。膽敢攜帶進城。實屬
藐法。著即交刑部嚴審辦理。惟此項煙片。近聞購食
者頗多。姦商牟利販賣。接踵而來。崇文門專理稅務
僅於所屬口岸地方稽察。恐尚未能周到。仍著步軍
統領五城御史。於各門禁嚴密訪查。一有緝獲。即當
按律懲治。並將其煙物毀棄。至閩省出產之地。並著
該督撫關差查禁。斷其來源。毋得視為具文。任其偷
漏。○又

諭。御史西郎阿奏訪聞。專典八旗兵丁錢糧之山東民
人。請旨嚴禁一摺。向來民人向八旗兵丁施放轉子。

印子等錢。月取錢糧。例禁綦嚴。今據該御史所稱。竟有山東民人在八旗各衙門左近。託開店鋪。潛身放債。名曰典錢糧。以一月之期。取倍蓰之利。每月屆兵丁等支領錢糧。該民人即在該衙門首攔去扣算。該兵丁於本月養贍不敷。勢不能不將次月錢糧逐月遞典。到被層層盤剝。受虧無窮。似此設計取利。較施放轉子印子等錢。尤為刁惡。於八旗兵丁生計。大有關係。著步軍統領衙門嚴密查拏。勿令潛蹤。○十六年

諭。本日據步軍統領衙門奏。拏獲偷竊豐益倉米石賊

犯已交刑部嚴審定擬具奏矣。豐益倉距圓明園宮牆甚近。該賊匪膽敢偷竊官倉米石。並拒捕札傷巡夜弁兵。實屬目無法紀。因思皇城及紫禁城內如有拒捕逞兇。及自戕案犯。俱從重問擬。例有專條。以示禁地森嚴。非恆常可比。朕今駐蹕圓明園。則相近地界。即與禁城無異。著交刑部酌議。如朕駐蹕圓明園及巡幸之處。其左近地方。遇有竊盜逞兇等案。距宮牆若干里。應仿照紫禁城之例。擬何罪名。稍遠若干里。應仿照皇城之例。擬何罪名。酌定科條奏明。載入則例。如值不駐蹕之日。仍照常例行。所有此案賊犯。

即照新例辦理○又奉

旨。綿課等奏會議查倉章程一摺。朝陽門外太平等五倉。於嘉慶五年改定舊例。由步軍統領衙門派撥北左二營弁兵看守。仍照向例。欽派王大臣每月夜間輪流出城稽察數次。原以防範該弁兵等偷安誤班情弊。但稽查之日。須先行知該衙門委弁前往劄門。則看倉官兵自必早得查倉之信。不難豫作準備。迨查畢後。仍可抽減人數。懈怠曠班。於防弊之道殊屬有名無實。且城門晝夜啟閉。該王大臣隨從多人。看門官兵。勢不能逐名盤詰。恐姦宄得以夾混出入。尤

非所以昭慎重。嗣後毋庸欽派王大臣夜出查倉。即照依豐益倉之例。由步軍統領衙門添派北左二營將官。在該倉廩等處上夜認真稽查。如查有曠誤。即稟報祿康等嚴叅究辦。儻徇隱不報。當並治以重罪。

○又

諭京師第宅雲連。市廛棋布。為四方會極之區。大小街巷。設立堆撥柵欄。分派弁兵。晝夜巡察。法至備也。向例房舍牆垣。遇有傾圮。即令報官修整。以復舊觀。乃近年以來。竟有私拆房間。將甃瓦木植零星售賣者。積日既久。衢巷之間。漸多隙地。何以壯肅觀瞻。甚至

巷宇毗連之處來往成蹊而柵門之啟閉轉同虛設於擊柝禁暴之義必致防檢多疏步軍統領衙門專司管轄廢弛若此各將誰歸嗣後內城房屋遵照定制概不許私行拆毀其歲久坍塌者責令隨時修葺完整儻有仍前私售輒木該管地界官兵立即報明飭禁若官兵明知故縱查明懲處從前步軍統領有兼御前大臣軍機大臣尚書事務繁瀆稽查未周今祿康管理吏部又不兼司旗務尤當專心將步軍營一應事宜詳考舊章認真整頓毋得因循姑息置諸廢弛於不問也○又

諭番子王鑑等。既在步軍統領衙門充役。自應畏法奉公。一切犯禁滋事之徒。皆當隨時偵緝。乃於祿康明亮所用轎夫。開設賭局。並不拏送。雖據供祿康係本管官。素未奉有查拏自家轎夫之諭。不敢輒查。何以明亮轎夫亦任其開局聚賭。顯係知情故縱。本當徹底究明。立予發遣。惟念祿康一味寬縱。平日於查賭博等事。毫無整頓。此次伊轎夫局賭一案。係於上月二十九日。轎夫聞風逃散之後。始飭令查拏。前此竟未諭及。是該番役等膽玩骫法。皆祿康懈弛所致。現在案犯尚未全獲。仍應責令上緊緝拏。王鑑聞國祥

李瑛著俱革去頂戴。劉起鳳交該衙門量加責處。以示薄懲。嗣後該衙門務須嚴行管束。若再有玩縱情弊。即當從重治罪。毋許隱庇。○又奏棚鋪與人搭蓋涼棚。以及婚喪之事。搭用棚座。原無干例禁。若與賭局搭棚。即將租與開設賭局之房間棚座。概行入官。其中官房。應將官房庫經營之人。交內務府查明懲治。仍於京城內外出示曉諭。儻再有犯者。不但將房間棚座入官。並將房主鋪戶一併治罪。其窩倡及輓棚之案。一經拏獲。同此示懲。奉

旨。步軍統領衙門奏請將出租開設賭局之房間棚座。入官懲創。並請嗣後明定規條等語。此等游手匪徒。經年累月。聚賭不散。其房主及搭棚鋪戶。斷無不知。明係將房間棚座。重利出租。知情容隱。不可不一併懲創。但從前既未飭禁。此時亦未便坐罪。姑先酌量薄懲。所有此次聚賭各案之房間棚座。著概行入官。至此後若再有似此干禁圖利者。則不但將房間棚座入官。並當將房主鋪戶。治以應得之罪。如係租住官房。並著內務府將經管官房之人。查明懲治。此外窩倡及軟棚等案。其房間棚座。均即照窩賭之例究

辦○又奉

旨。向來製造火藥。即官局俱在曠闊地面。此案民人崔大花爆作坊。開設鬧市。本屬非宜。著五城逐一查明。俱飭令遷徙空閒處。以昭慎重。○十七年

諭。給事中甘家斌奏。請禁止婦女入廟。以維風化。寺院庵觀。不准婦女進內燒香。本有例禁。京城廟宇叢多。或日久奉行不力。著步軍統領順天府五城。出示曉諭。如有開設會場。招搖婦女入寺者。一併查禁。至所奏廟宇收留匪徒一節。各寺院間曠房屋。招租取利。在所不禁。但亦須分別良莠。若知情容留姦宄。一經

發覺將該僧道從重治罪。○又

諭京師首善之區。商賈雲集。正陽門大街兩旁。向有負販人等。列肆貿易。勢難查禁。但毋許侵占軌轍。以便車馬往來。著步軍統領及督理街道衙門。隨時稽查。如沿街鋪戶及市僧等。搭棚露積。致礙官街者。即押令移徙。以利經涂。○又

諭京城街巷溝渠。每年循例疏治。以利經涂。若虛應故事。致有壅塞。值大雨時行。必致停滯。有礙往來。著交工部步軍統領暨督理街道衙門。隨時稽查。如有溝渠坍塌。及街巷積水之處。查明修整。其修費著落承

辦之員。分別攤賠。○又奉

旨。崇文門稅務。從前徵收課額。並無缺少。近年何以遽形短絀。吉綸所奏。白役冒充海巡。勾通透漏等弊。自係實在情形。前正副監督因家丁人少。稽查難周。吉綸玉麟現任步軍統領左翼總兵。兼管稅務。所屬兵役人衆。足敷稽查。著即分飭周巡。將冒充海巡之白役人等。嚴拏懲辦。如有私收私放。及藉端訛索等弊。一併嚴懲。崇文門稽查稅貨地面。多係京營所轄。即著該管營汛官員。分任巡查之責。將來吉綸玉麟任滿後。更換監督。亦著照此辦理。○同治六年奏准。碧

雲寺後現有後尾子窯一座密通

園庭即飭封閉永禁開挖嗣後如有在京營地面報開窯座者悉令報明步軍統領衙門順天府酌覈情節分別准駁以便稽查○又奏准如有匪徒指稱官廳早年欠債藉詞構訟者無論在何處控告均不准行儻有膽敢在廳影射辦事身後把持一經發覺即照棍徒擾害地方例加等治罪設有不肖之員借其私債即一併從重治罪